

Mirna šetnja u Tuzli kao podsjetnik na srebreničku tragediju (Foto)

Tradicionalnom šetnjom tuzlanskim ulicama građani ovog grada danas su odali počast žrtvama ubijenim u julu 1995. godine, tokom srebreničkog genocida.

Organizatori su podsjetili da se prelazi 8.372 koraka, odnosno po jedan korak za svakog ubijenog, javlja Anadolu Agency (AA).

Ševala Halilović iz Bratunca, jedna je od učesnica današnje mirne šetnje, u genocidu je izgubila 30 članova bližnje rodbine.

“Od 1992. godine sam u Tuzli i nisam bila u Srebrenici tokom genocida. Nažalost, ubijeno je 30 mojih i muževih rođaka i rodica i to je nešto što se, uz ostale žrtve, nikada ne smije zaboraviti”, kazala je Halilović.

Eldar Lolić iz Tuzle istaknuo je da se o genocidu treba pričati i da se o toj najvećoj bh. rani mora stalno opominjati, te učiti djecu kako se slično više nikada ne bi ponovilo.

I Suad Halilčević poručio je da “mašina zla nije uspjela istrijebiti ovaj narod”.

“Genocid je najpogubniji čin ljudske diskriminacije”, smatra Halilčević, prenosi Anadoluja.

Date: 10-07-2017